

JAHAAÑ BAANI ATA KARDIEN

Jahaañ Baani Ataa kardeiñ bhari Jannat hiba kardeiñ
Nabi Mukhtaar e kul hain jis ko jo chaahein ataa kardeiñ

Jahaañ mein un ki chalti hai wo dum mein kya se kya kardeiñ
Zameen ko Aasmaan kardeiñ suraiya ka saraa kardeiñ

Fazaa mein udne waale yun na itraayein nida kardeiñ
Wo jab chaahein jise chaahein usey farma rawaa kardeiñ

Meri mushkil ko yun aasaan mere Mushkil kusha kardeiñ
Har ek mauje balaa ko mere Maula naakhuda kardeiñ

Munawwar meri aankhon ko mere Shamsud Duha kardeiñ
Gamon ki dhoop mein wo Saaya e Zulfe Dota kardeiñ

Ataa ho bekhudi mujhko khudi meri hawaa kardeiñ
Mujhe yun apni ulfat mein mere maula fanaa kardeiñ

Jahaañ mein aam paigaam e shahe Ahmed Raza kardeiñ
Palat kar peechhe dekhein phir se tajdeed e wafa kardeiñ

Nabi se jo ho begaana usey dil se juda kardeiñ
Pidar, Maadar, Biraadar, maalo jaan un par fida kardeiñ

Kisi ko wo haansaate haiñ kisi ko woh rulaate haiñ
Wo yunhi aazmaate haiñ wo ab to faisla kardeiñ

Gil e Taiba mein mil jaoon gulon mein mil ke khil jaoon
Hayaat e jaawedaani se mujhe yun aashna kardeiñ

Unhein manzoor hai jab tak ye daur e aazmaish hai
Na chaahein to abhi wo khatm daure ibtila kardeiñ

Mujhe kya fikr ho **AKHTAR** mere yaawar haiñ wo yaawar
Balaaon ko jo meri khud Giraftaar-e-balaa kardeiñ

MUSTAFA E ZAATE YAKTA AAP HAIÑ

Mustafa e Zaate yakta Aap haiñ
Yak ne jisko yak banaaya Aap haiñ

Aap jaisa koi ho sakta nahiñ
Apni har khoobi mein tanha Aap haiñ

Aabo gil mein noor ki pehli kiran
Jaane Aadam Jaane Hawwa Aap haiñ

La Makaañ tak jis ki phaili Raushni
Wo Charaage Aalam Aara Aap haiñ

Hai Namak jis ka khameer e husn mein
Wo Maleeha husn Aara Aap haiñ

Naazish e Arsho waqaar e Arshiyaañ
Saahibe qausain o adna Aap haiñ

Aap ki Tal'at Khuda ka aaina
Jis mein chamke Haq ka Jalwa Aap haiñ

Aap ko Rab ne kiya apna Habeeb
Saari khalqat ka Khulaasa Aap haiñ

Aap ki khaatir banaaye do jahaan
Apni khaatir jo banaaya Aap haiñ

Jaañ tui Jaanaañ Qaraare Jaañ tui
Jaane Jaañ Jaane Maseeha Aap haiñ

Aap se khud aap ka saail huñ maiñ
Jaane Jaañ meri tamanna Aap haiñ

Aap ki Tal'at ko dekha jaan di
Qabr mein pahuñcha to dekha Aap haiñ

Bar Darat Aamad gadaa behre Sawaal
Ho bhala **AKHTAR** ka daata Aap haiñ

WAJ-HE NISHAAT E ZINDAGI

Waj-he Nishaat e Zindagi Raahat e Jaañ tum hi to ho
Rooh e rawaan e zindagi Jaan e Jahaan tum hi to ho

Tum jo na the to kuchh na tha Tum jo na ho to kuchh na ho
Jaan e Jahaan tum hi to ho Jaan e Jinaan tum hi to ho

Noor e Khuda ho sar basar Saaya se maa waraa bashar
Saare jahaan pe magar Saaya kinaan tum hi to ho

Taaj e Waqaar e khaakiyaañ Naazish e Arsh o Arshiyaañ
Fakhr e Zameen o Aasmaan Fakhr e Zamaan tum hi to ho

Kis se karoñ bayaan e gam Kaun suney fugaan e gam
Paañ kahaan amaan e gam Amn o amaan tum hi to ho

Rooh e rawaan e zindagi Taab o tawaan e zindagi
Amn o amaan e zindagi Shaahe shahaan tum hi to ho

Tum ho charag e zindagi Tum ho jahaan ki raushni
Mehr o mah o nujoom mein Jalwa kunaan tum hi to ho

Tum se jahaan e rang o bu Tum ho chaman ki aabru
Jaan e bahaar e gulsitaan Sarve chamaan tum hi to ho

Tum ho qawaam e zindagi Tum se hai zindagi bani
Tum se kahe hai zindagi Rooh e rawaan tum hi to ho

Asle shajar mein ho tum hi Nakhl o samar mein ho tum hi
Un mein ayaan tum hi to ho Un mein numaan tum hi to ho

Tum ho numood e awwalieñ Sham'e abad bhi ho tum hi
Shaah e zaman yahaan wahaan Sikka nishaan tum hi to ho

AKHTAR ki hai majaal kya mehshar mein sab haiñ dum bakhud
Sab ki nazar tum hi pe hai Sab ki zubaan tum hi to ho

DAAG E FURQAT E TAIBA

Daag e Furqat e Taiba Qalb muzmahil jaata
Kaash Gumbad e Khazra dekhne ko mil jaata

Mera dum nikal jaata unke aastaane par
Un ke aastaane ki khaak mein main mil jaata

Mere dil se dhul jaata daage Furqat e Taiba
Taiba mein fanaa hokar taiba mein hi mil jaata

Maut le ke aa jaati zindagi Madine mein
Maut se galey mil kar zindagi mein mil jaata

Khuld e zaar e Taiba ka is tarah safar hota
Peechhe Peechhe sar jaata aage aage dil jaata

Dil pe jab kiran padti un ke sabz gumbad ki
Us ki sabz rangat se baag ban ke khil jaata

Furqat e Madina ne wo diye mujhe sadme
Koh par agar padte koh bhi to hil jaata

Dil mera bichha hota un ki reh guzaaron mein
Un ke naqshe paa se yun mil ke mustaqil jaata

Dil pe wo qadam rakhte naqshe paa ye dil bantaa
Ya to khaake paa ban kar paa se muttasil jaata

Wo khiraam farmaate mere deeda o dil par
Deeda main fida kartaa sadqe mera dil jaata

Chashme tar wahaan behti dil ka mudd'aa kehti
Aah ba adab rehti munh mera sil jaata

Dar pe dil jhuka hota izn paake phir badhta
Har gunah yaad aata dil khajil khajil jaata

Mere dil mein bas jaata jalwa zaar Taiba ka
Daag e Furqat e Taiba phool ban ke khil jaata

Un ke dar pe **AKHTAR** ki hasratein huwain poori
Saail e dare aqdas kaise munfa'il jaata

TUM CHALO HUM CHALEIN

Tum chalo hum chalein sab madine chalein
Jaanib e Taiba sab ke safeene chalein

Maikasho! Aao Aao Madine chalein
Baada e Khuld ke jaam peene chalein

Jee gaye wo Madine mein jo mar gaye
Aao hum bhi wahaan mar ke jeene chalein

Taair e jaan Madine ko jab ud chala
Zindagi se kaha zindagi ne chalein

Rahe Taiba mein jab naatawaan reh gaye
Dil ko kheencha kaha be kali ne chalein

Khaake Taiba mein apni jaga ho gayi
Khoob muzda sunaaya khushi ne chalein

Agley pichhle sabhi khuld mein chal diye
Rozey mehshar kaha jab Nabi ne chalein

Un ki shaane karam ki kashish dekhna
Kaasa lekar kaha khusrawi ne chalein

AKHTAR e Khasta bhi khuld mein chal diya
Jab sadaa di usey murshidi ne chalein

HAR NAZAR KAAÑP UTHEGI

Har nazar kaañp uthegi mehshar ke din
 Khauf se har kaleja dahel jaayega
 Par ye naaz un ke bande ka dekheñge sab
 Thaam kar un ka daaman machal jaayega

Mauj katra ke hum se chali jaayegi
 Rukh mukhaalif hawa ka badal jaayega
 Jab ishaara karenge wo Naam e Khuda
 Apna beda bhañwar se nikal jaayega

Yuñ to jeeta huñ hukme Khuda se magar
 Mere dil ki hai unko yaqeenan khabar
 Haasil e zindagi hoga wo din mera
 Un ke qadmoñ pe jab dum nikal jaayega

Rabbe Sallim wo farmaane wale miley
 Kyuñ sataatey haiñ aye dil tujhe waswasey
 Pul se guzrenge hum wajd karte huwe
 Kaun kehta hai paoñ phisal jaayega

AKHTAR e khasta kyuñ itna be chain hai
 Tera Aaqah Shaahshaah Kaunain hai
 Lau lagaa to sahi Shaahe Laulaak se
 Gam masarrat ke saañche mein dhal jaayega

TALAATUM HAI YE KAISA

Talaatum hai ye kaisa aañsuoñ ka deeda e tar mein
 Ye kaisi maujein aayi haiñ tamanna ke samandar mein

Hujoom e shauq kaisa intezaar e kuwe dilbar mein
 Dil e shaida samaata kyuñ nahiñ ab pehlu o bar mein

Tajassus karwatein kyuñ le raha hai qalb e muztar mein
 Madina saamne hai bas abhi pahuñcha maiñ dum bhar mein

Madine tak pahunch jaata kahañ taaqat thi ye par mein
 Ye Sarwar ka karam hai Hai jo bulbul baage Sarwar mein

Jo tu aye taa'ire jaañ kaam leta kuchh bhi himmat se
 Nazar ban kar pahunch jaate tajalli gaahe Sarwar mein

Na rakha mujh ko Taiba ki qafas mein is sitamgar ne
 Sitam kaisa huwa bulbul pe ye qaid e sitamgar mein

Sitam se apne mit jaoge tum khud aye sitamgaaro
 Suno hum keh rahe haiñ be khatar daur e sitamgar mein

Banaate jalwa gaahe naaz mere deeda o dil ko
 Kabhi rehte wo is ghar mein kabhi rehte wo is ghar mein

Madine se rahein khud dur is ko rokne wale
 Madine mein khud **AKHTAR** hai Madina chashme **AKHTAR** mein

BUL HAWAS SUN SEEM O ZAR KI

Bul hawas sun seem o zar ki bandagi achchhi nahiñ
 Un ke dar ki bheek achchhi sarwari achchhi nahiñ

Sarwari kya cheez hai Un ki gadaai ke huzoor
 Un ke dar ki bheek achchhi sarwari achchhi nahiñ

Un ki chaukhat choom kar khud keh rahi hai sarwari
 Un ke dar ki bheek achchhi sarwari achchhi nahiñ

Sarwari khud hai bhikaaran bandgaane shah ki
 Un ke dar ki bheek achchhi sarwari achchhi nahiñ

Sarwari paakar bhi kehte haiñ gadaayaan e Huzoor
 Un ke dar ki bheek achchhi sarwari achchhi nahiñ

Taaj ko kaasaa banaakar taajwar kehte haiñ yuñ
 Un ke dar ki bheek achchhi sarwari achchhi nahiñ

Mufti-e-Aazam yaakey az mardumaane Mustafa
 Is Raza e Mustafa se dushmani achchhi nahiñ

Hujjatul Islam Aye Haamid Raza Baba e Mann
Tum ko bin dekhe hamaari zindagi achchhi nahiñ

Khaak e Taiba ki talab meiñ khaak ho ye zindagi
Khaak e Taiba achchhi apni zindagi achchhi nahiñ

Dasht e Taiba chhord kar maiñ sair e jannat ko chaluñ
Rehne deeje shaikh ji diwaangi achchhi nahiñ

Jo Junoon e khuld meiñ kawwoñ ko de baithe dharam
Aise andhe Shaikh ji ki pairwi achchhi nahiñ

Aql chaupaayoñ ko de baithe Hakeem e Thaanvi
Maiñ na kehta tha ke sohbat dev ki achchhi nahiñ

Jo piya ko bhaaye **AKHTAR** wo suhaana raag hai
Jis se na khush hoñ piya wo raagni achchhi nahiñ

APNE DAR PE JO BULAAO TO BAHUT ACHCHHA HO

Apne dar pe jo bulaa to bahut achchha ho
Meri bigdi jo banaao to bahut achchha ho

Qaid e shaitaan se chhurdaao to bahut achchha ho
Mujh ko apna jo banaao to bahut achchha ho

Gardish e daur ne paamaal kiya mujh ko Huzoor
Apne qadmoñ meiñ sulaa to bahut achchha ho

Yuñ to kehlaata hooñ banda maiñ tumhaara lekin
Apna keh ke jo bulaa to bahut achchha ho

Tum to murdoñ ko jilaa dete ho mere Aaqa
Mere dil ko bhi jilaa to bahut achchha ho

Jis ne sharminda kiya mehr o maho anjum ko
Ek jhalak phir wo dikhaao to bahut achchha ho

Ro chuka yuñ to maiñ auroñ ke liye khoob magar
Apni ulfat meiñ rulaa to bahut achchha ho

Yuñ na **AKHTAR** ko phiraa mere Maula dar dar
Apni chaukhat pe bithaa to bahut achchha ho

SAMBHAL JA AYE DIL E MUZTAR

Sambhal ja aye dil e muztar Madina aane wala hai
Luta aye chashme tar gouhar Madina aane wala hai

Qadam ban jaaye mera sar Madina aane wala hai
Bichhuñ rah meiñ nazar bankar Madina aane wala hai

Jo dekhe un ka naqsh e paa Khuda se wo nazar maañguñ
Charag e dil chaloñ lekar Madina aane wala hai

Karam un ka chala yuñ dil se kehta raahe Taiba meiñ
Dil e muztar tasalli kar Madina aane wala hai

Nichhaawar haiñ Madina ki Ye mera dil meri aañkheiñ
Nichhaawar huñ Madina par Madina aane wala hai

Ilahi maiñ Talabgaare Fana hooñ Khaak e Taiba meiñ
Ilahi kar nisaar e dar Madina aane wala hai

Madina ko chala maiñ be niyaaz-e-rehbar e manzil
Rahe Taiba hai khud rehbar Madina aane wala hai

Mujhe kheeñche liye jaata hai shauq e koocha e jaanaañ
Khiñcha jaata huñ maiñ yaksar Madina aane wala hai

Wo chamka Gumbade Khazra wo Shehr e pur ziya aaya
Dhale ab noor meiñ paikar Madina aane wala hai

Talabgaar e Madina tak Madina khud hi aajaaye
Tu duniya se kanaara kar Madina aane wala hai

Madina aagaya ab der kya hai sirf itni si
Tu khaali kar ye dil ka ghar Madina aane wala hai

Falak shaayad zameen par reh gaya khaak e guzar ban kar
Bichhe haiñ raah mein Akhtar Madina aane wala hai

Qamar aaya hai shaayad un ke talwoñ ki ziya lene
Bichha hai chaand ka bistar Madina aane wala hai

Mohammed ke gadaa kuchh farsh waale hi nahiñ dekho
Wo aata hai shahe khaawar Madina aane wala hai

Gubaar e Raahe anwar kis qadar pur noor hai **AKHTAR**
Tani hai noor ki chaadar Madina aane wala hai

TERE DAMAN E KARAM MAIÑ

Tere daaman e karam mein jise neend aa gayi hai
Jo fanaa na hogi aisi usey zindagi mili hai

Mujhe kya padi kisi se karoon arz mudda'a maiñ
Meri lau to bas unhiñ ke dare jood se lagi hai

Wo jahaan bhar ke daataa mujhe pher deñge khaali
Meri Tauba aye khuda! ye mere nafs ki badi hai

Jo paye sawaal aaye mujhe dekh kar ye bole
Isey chain se sulao ke ye banda e Nabi hai

Maiñ maroon to mere maula ye malaika se keh dein
Koi is ko mat jagaana abhi aankh lag gayi hai

Maiñ Gunaahgaar hoon aur bade martabon ki khwaahish
Tu magar kareem hai, khu teri banda parwari hai

Teri yaad thapki dekar mujhe ab shaha sulaade
Mujhe jaagte huwe yun badi der ho gayi hai

Aye Naseem e kuwe jaanaañ zara sooye bad naseebaañ
Chali aa khuli hai tujh pe jo hamari be kasi hai

Tera dil shikasta **AKHTAR** isi intezaar mein hai
Ke abhi nawed e waslat tere dar se aa rahi hai

FURQAT E TAIBA KI WEHSHAT DIL SE JAAYE KHAIR SE

Furqat e Taiba ki wehshat dil se jaaye Khair se
Maiñ Madina ka chalon wo din phir aaye Khair se

Dil mein hasrat koi baaqi reh na jaaye Khair se
Raahe Taiba mein mujhe yun maut aaye Khair se

Mere din phir jaayen Ya Rab! Shab wo aaye Khair se
Dil mein jab maahe Madina ghar banaaye Khair se

Raat meri din baney un ki liqaaye Khair se
Qabr mein jab un ki tal'at jagmagaaye Khair se

Haiñ Gani ke dar pe hum bistar jamaaye Khair se
Khair ke taalib kahañ jaayenge jaaye Khair se

Wo khiraam e naaz farmaayein jo paaye Khair se
Kya bayaan wo zindagi ho dil jo paaye Khair se

Mar ke bhi dil se na jaaye ulfat e baag e Nabi
Khuld mein bhi baag e jaanaañ yaad aaye Khair se

Ranj o gam hon be nishaan aaye bahaar e be khizaan
Mere dil mein baage jaanaañ ki hawaa e Khair se

Intezaar un se kahe hai ba zubaan e chashm e nam
Kab Madina maiñ chalon kab tu bulaaye Khair se

Furqat e Taiba ke haathon jeete ji murda huwe
Maut, Ya Rab! hum ko taiba mein jilaaye Khair se

Zinda baad aye aarzu e baag e Taiba Zinda baad
Tere dum se haiñ Zamaane ke sataaye Khair se

Najdiyoñ ki cheera dasti ya Ilahi! Taabakey
Ye balaa e Najdiya Taiba se jaaye Khair se

Jhaańk lo Aańkhoń meĩn un ki hasrat-e-Taiba liye
Zaair-e-Taiba ziya e Taiba laaye Khair se

Sang e dar se aa miley Taiba meĩn ab to ja miley
Aa gaye dar pe tere, tere bulaaye Khair se

Gosh bar Aawaaz hoñ qudsi bhi us ke geet par
Baag-e-Taiba meĩn jab **AKHTAR** gungunaaye Khair se

APNE RINDOÑ KI ZIYA AFAT KIJIE

Apne rindoñ ki ziyaafat Kijiye
Jaam e Nazzara Inaayat Kijiye

Saqi e Kausar duhaai Aap ki
Sokhta jaanoñ pe Rehmat kijiye

Dijiye meri Mohabbat ko hawaa
Is taraf Chashm e Mohabbat Kijiye

Qaid e gam meĩn khush rahooñ maiñ umr bhar
Yuñ Giraftaar e Mohabbat kijiye

Khud ko bhooluñ aap ki ulfat meĩn maiñ
Mujh ko yuñ madhosh e ulfat kijiye

Kijiye apna mahez apna mujhe
Qat'a meri sab se nisbat kijiye

Daf'a ho Taiba se ye najdi balaa
Ya Rasoolallaah e Ujlat Kijiye

Maang lijey Khaak e Taiba meĩn jagah
Khaak meĩn Saamaan e Ishrat Kijiye

Un pe marna hai dawaam e Zindagi
Maut se phir kyuñ na ulfat Kijiye

Un pe mar jaane ki Rakhiye Aarzu
Yuñ Sadaa Jeene ki Soorat Kijiye

Zulmatoñ meĩn Roshni ke Waaste
Daag e Seenaa ki Hifaazat Kijiye

Tez Keejey seena e najdi ki aag
Zikr e Aayat e Walaadat Kijiye

Intezaar e Jaan e Jaañ hai Jaan ko
Ya Rasoolallaah eki kasrat Kijiye

Gaus e Aazam aap se fariyad hai
Dastageeri Mere Hazrat Kijiye

Rehlat-e-**AKHTAR** ka Hangaam aagaya
Saaya e Rehmat meĩn Rukhsat Kijiye

FARISHTE JIS KE ZAAIR HAIÑ

Farishte Jis ke Zaaire haiñ Madine meĩn wo Turbat hai
Ye wo Turbat hai jis ko Arsh e Aazam par fazeelat hai

Bhalaa dasht e Madina se chaman ko koi nisbat hai
Madine ki Faza rashk e Bahaar e Baag e Jannat hai

Madina Gar Salaamat hai to phir sab kuchh Salaamat hai
Khuda rakhe Madine ko isi ka dum Ganeemat hai

Madina aisa Gulshan hai jo har gulshan ki zeenat hai
Bahaar e Baag e Jannat bhi Madine ki badaulat hai

Madina chhord kar sair e jinaañ ki kya zuroorat hai
Ye Jannat se bhi behtar hai ye jeete ji ki jannat hai

Madina chhord kar Jannat ki khushboo mil nahiñ sakti
Madine se Mohabbat hai to Jannat ki zamaanat hai

Zameeñ par wo Mohammed ehain wo Ahmed eAasmaanoñ meñ
Yahañ bhi un ka charcha hai Wahaañ bhi un ki midhat hai

Yahañ bhi Un ki chalti hai wahaañ bhi Un ki chalti hai
Madina Rajdhaani hai do Aalam par hukoomat hai

Gazab hi kar diya **AKHTAR** Madine se chale aaye
Ye wo Jannat hai jis ki Arsh waaloñ ko bhi hasrat hai

Madina chhord kar **AKHTAR** bhalaa kyuñ jaayeñ jannat ko
Ye Jannat kya har ek ne'amat Madine ki badaulat hai

MERE ALLAH KE NIGAAR SALAAM

Mere Allah ke nigaar Salaam
Dast e Qudrat ke Shaah Kaar Salaam

Donoñ Aalam ke tajdaar Salaam
Jaane har jaano jaandaar Salaam

Nakhat e har chaman hazaar Salaam
Jaan-e-har bulbul Hazaar Salaam

Khaak e Taiba baney meri hasti
Arz karta hai khaaksaar Salaam

Phir Madine meñ kab bulaaoge
Tum se kehta hai Intezaar Salaam

Mujh ko Zaalim pe ikhtiyaar nahiñ
Tum to rakhte ho ikhtiyaar Salaam

Khuld kehti hai yuñ Madine se
Tujh pe aye khuld ki bahaar Salaam

Motiyooñ ko sajaa ke palkooñ par
Kehti hai chashm e Ashkbaar Salaam

Apni ulfat ka aisaa jaam pila
Jis ka badhta rahe khumaar Salaam

Dil ki dhadkan Tumhaari yaad baney
Har nafas tum pe be shumaar Salaam

Teri Khaatir Zaleel hona hai
Meri Izzat mere waqaar Salaam

Apne **AKHTAR** ka lo Salaam Shaha
Tum pe aye jaan aye Qaraar Salaam

AYE SABA LE JA MADINE KO PAYAAM

Aye Saba le ja Madine ko payaam
Arz karde un se baa sad Ehteraam

Aye Makeen e Gumbad e Khazra Salaam
Aye Shakeb e har dil e Shaida Salaam

Ab Madine meñ mujhe bulwaaiye
Apne bekas par karam farmaaiye

Bulbul e bey par pe ho jaaye karam
Aashiyanaash deh ba Gulzaar e Haram

Hind ka jungle mujhe bhaata nahiñ
Bas gayi Aañoñ meñ Taiba ki Zameeñ

Zindagi ke haiñ Madine meñ mazey
Aish jo chaah e Madine ko chaley

Zindagi ke haiñ Madine mein mazey
Aish jo chahe Madine mein marey

Khuld ki khaatir Madina chhord duñ
Eiñ khayalast o muhalast o Junoon

Khuld ke taalib se keh do be gumaañ
Taalib e Taiba ki taalib hai jinaañ

Mujh se pehle mera dil haazir huwa
Ardh-e-Taiba kis qadar hai dilruba

Kitni raushañ hai yahaañ har ek shab
Har taraf hai taabish e Maahe Arab

Kya Madina ko Zuroorat chaand ki
Maahe Taiba ki hai har soo chaandni

Noor wale Saahib e Me'araaj haiñ
Mehr o Mah in ke sabhi mohtaaj haiñ

Aye khusha bakht e rasa e **AKHTARAT**
Baaz aawurdi gadaaraa bar darat

SHAJA'AT NAAZ KARTI HAI

Shaja'at Naaz karti hai Jalaalat Naaz karti hai
Wo Sultaan e Zamaañ haiñ Un pe Shaukat Naaz karti hai

Sadaaqat Naaz karti hai Amaanat Naaz karti hai
Hamiyat Naaz karti hai Murawwat Naaz Karti hai

Shahe Khoobaañ pe har khoobi o khaslat Naaz karti hai
Kareem aise haiñ wo un par Karaamat Naaz karti hai

Jahaan e Husn mein bhi kuchh niraali shaan hai Un ki
Nabi ke gul pe gulzaaron ki zeenat Naaz karti hai

Shahenshaahe Shaheedañ ho Anokhi Shaan wale ho Husain Ibne Ali tum par Shahaadat Naaz karti hai

Bitha kar Shaana e Aqdas pe kar di Shaan do baalaa
Nabi ke laadloñ par har fazeelat naaz karti hai

Fidaayi huñ to kis ka huñ Koi dekhe meri qismat
Qadam par jis haseen ki jaan e tal'at naaz karti hai

Khuda ke fazl se **AKHTAR** maiñ un ka naam lewa huñ
Main huñ qismat pe naazaañ Mujh pe qismat naaz karti hai

PEERON KE AAP PEER HAIN

Peeron ke Aap peer haiñ Ya Gaus Al Madad
Ahle safaa ke meer haiñ Ya Gaus Al Madad

Ranjo alam kaseer haiñ Ya Gaus Al Madad
Hum Aajizo aseer haiñ Ya Gaus Al Madad

Hum kaise jee rahe haiñ ye tum se kya kaheñ
Hum haiñ alam ke teer haiñ Ya Gaus Al Madad

Teere Nazar se pher do saare alam ke teer
Kya ye alam ke teer haiñ Ya Gaus Al Madad

Tere hi haath laaj hai Ya Peer e Dastageer
Hum tujh se dastageer haiñ Ya Gaus Al Madad

Idfa sharara shar Ya Gausanal Abar
Shar ke sharar khateer haiñ Ya Gaus Al Madad

Kis dil se ho bayaan e be daad e Zaalimaañ
Zaalim bade shareer haiñ Ya Gaus Al Madad

Ahle safaa ne paayi tum se rahe Safaa
Sab tum se mustaneer haiñ Ya Gaus Al Madad

Sadqa Rasool e Paak ka jholi mein daal do
Hum Qadri Faqeer haiñ Ya Gaus Al Madad

Dil ki Sunaaye **AKHTAR** dil ki zubaan mein
Kehte ye behte neer haiñ Ya Gaus Al Madad

TUMHEIÑ JIS NE BHI DEKHA KEH UTHA

Tumheĩn jis ne bhi dekha keh utha Ahmed Raza Tum ho
Jamaal e Hazrat e Ahmed Raza ka Aaina Tum ho

Nahiñ Haamid Raza hum mein magar waj-he shak-e baa'i
Khuda rakhe tumheĩn zinda mere Haamid numa Tum ho

Tumhaare naam mein tum ko buzurgi ki sanad haasil
Raza waj-he buzurgi hai Raza e Mustafa Tum ho

Tumhaari rif'atoñ ki ibteda bhi paa nahi sakta
ke uftaada zameeñ huñ maiñ bulandi ka samaa Tum ho

Hayaat o maut waabasta tumhaare dum se haiñ donoñ
Hamaari zindagi ho aur dushman ki qazaa tum ho

Ye Noori chehra ye Noori adaayeĩn sab ye kehte haiñ
Shabeeh e Gaus ho Noori Miyaañ ho aur Raza Tum ho

Janaab e Mufti e Aazam ke Faizaan e Tajalli se
Shabistaane Raza mein Khair se **AKHTAR** Raza Tum ho

MUFTI E AAZAM E DEEN E KHAIRUL WARAA

Mufti e Aazam-e deen-e Khairul Waraa
Jalwa e Shaan e Irfaan e Ahmed Raza

Deed e Ahmed Raza hai tumheĩn dekhna
Zaat e Ahmed Raza ka ho tum aaina

Kya kahooñ haq ke ho kaise tum muqtada
Muqtadaayaañ e Haq karte haiñ iqtada

Un ki midhat ko maiñ kis se maañgu zubaan
Kya maqaam e suraiya bataaye saraa

Ahmed-e-Noori ke haiñ ye mazhar tamaam
Ye haiñ Noori Miyaañ Noori har har adaa

Noor ki mai pilaate haiñ ye roz o shab
Jis ko peena ho aaye hai Maikhaana wa

Haiñ bahut ilm waale bhi aur peer bhi
Aañkhoñ dekha na un sa na kaanoñ suna

Un ka saaya saroñ par salaamat rahe
Muñh sadaate raheñ yuñhi dushman sadaa

Un ke haasid pe wo dekho bijli giri
Wo jalaa dekh kar wo jalaa wo jalaa

Wo jaleñge hamesha jo tujh se jaleĩn
Marke bhi dil jaloñ ko na chain aayega

Aashiqoñ ke jigar un se thande raheĩn
Dushmanoñ par raheĩn ban ke shakle Qazaa

Aur hoñge jinheĩn tujh se laalach ho kuchh
Tere **AKHTAR** ko kaafi hai teri Raza

CHAL DIYE TUM AAN̄KH MEIN

Chal diye tum aañkh mein ashkoñ ka dariya chhord kar
Ranj e Furqat ka har ek seena mein shola chhord kar

Lazzat-e-mai le gaya wo jaam o meena chhord kar
Mera Saqi chal diya khud mai ko tishna chhord kar

Har jigar mein dard apna meetha meetha chhord kar
Chal diye wo dil mein apna naqsh e waala chhord kar

Aalam e baalaa mein har su marhaba ki goonj thi
Chal diye jab tum zamaane bhar ko soona chhord kar

Maut e aalim se bandhi hai maut e aalam be gumaan
Roohe aalam chal diya aalam ko murda chhord kar

Muttaqi bankar dikhaaye is zamaane mein koi
Ek mere Mufti e Aazam ka taqwa chhord kar

Khwaab mein aakar dikhaao hum ko bhi aye jaañ kabhi
Kaun si duniya basaayi tum ne duniya chhord kar

Ek tum duniya mein rehkar taarik e duniya rahe
Reh ke duniya mein dikhaaye koi duniya chhord kar

Us ka aye shaahe zaman saara zamaana ho gaya
Jo tumhaara ho gaya saara zamaana chhord kar

Rehnumaaye Raahe Jannat hai tera naqshe qadam
Raahe jannat tay na hogi tera rasta chhord kar

Misl e gardoon saaya e dast e karam hai aaj bhi
Kaun kehta hai gaye wo be sahaara chhord kar

Ho sakey to dekh **AKHTAR** baag e jannat mein usey
Wo gayaa taaron se aage aashiyaana chhord kar

ZEENAT E SAJJAADA O BAZM E QAZAA MILTA NAHIÑ

Zeenat e Sajjaada o bazm e qazaa milta nahiñ
Laal e yakta e Shahe Ahmed Raza milta nahiñ

Wo jo apne daur ka Siddeeq tha milta nahiñ
Mehrame Raaz e Mohammed Mustafa milta nahiñ

Ab charaag e dil jalaakar ho sakey to dhoondiye
Partawe Gaus o Raza wo Mustafa milta nahiñ

Aalimoon ka mo'atabar wo peshwa milta nahiñ
Jo mujassam ilm tha wo kya huwa milta nahiñ

Isteqaamat ka wo kohe mohkam o baala tareeñ
Jis ke jaane se zamaana hil gaya milta nahiñ

Chaar yaaron ki adayein jis mein theeñ jalwa numaan
Chaar yaaron ka wo roshan aaina milta nahiñ

Ek shaakhe gul nahiñ saaraa chaman andohgeeñ
Mustafa ka andaleb e khushnawa milta nahiñ

Mufti e Aazam ka zarra kya banaa **AKHTAR** Raza
Mehfil e anjum mein Akhtar doosara milta nahiñ